



## O'ZBEKISTON RESPUBLIKASI VAZIRLAR MAHKAMASINING QARORI

20 24 yil « 13 » yanvar

№ 24

Toshkent sh.

### Республика давлат таълим муассасаларида ўқувчи ва талабаларга ўқув-услугий фильмлар ёрдамида дарс ўтиш тизимини жорий этиш чора-тадбирлари тўғрисида

Ўзбекистон Республикаси Президентининг “Ўзбекистон – 2030” стратегиясини 2023 йилда сифатли ва ўз вақтида амалга ошириш чора-тадбирлари тўғрисида” 2023 йил 11 сентябрдаги ПҚ–300-сон қарори ижросини таъминлаш мақсадида Вазирлар Маҳкамаси **қарор қилади:**

1. Ўзбекистон Республикаси Президентининг “Ўзбекистон – 2030” стратегиясини 2023 йилда сифатли ва ўз вақтида амалга ошириш чора-тадбирлари тўғрисида” 2023 йил 11 сентябрдаги ПҚ–300-сон қарорида таълим муассасаларида **ўқувчи ва талабаларга ўқув-услугий фильмлар ёрдамида дарс ўтиш** тизимини жорий этиш белгиланганлиги маълумот учун қабул қилинсин.

2. Республика давлат таълим муассасаларида дарс ўтиш учун фойдаланиладиган ўқув-услугий фильмларни ишлаб чиқариш тартиби тўғрисидаги низом **иловага мувофиқ** тасдиқлансин.

3. Маданият вазирлиги хузуридаги Кинематография агентлиги (кейинги ўринларда – Кинематография агентлиги) **2024 йил 1 апрелга** қадар ўқув-услугий фильмлар портали ва мобиль иловасини яратсин.

4. Белгилансинки:

Кинематография агентлиги буюртмасига асосан Олий таълим, фан ва инновациялар вазирлиги ҳамда Мактабгача ва мактаб таълими вазирлиги томонидан тасдиқланган рўйхатга мувофиқ ҳар йили 50 тагача ўқув-услугий фильм ишлаб чиқарилади;

ўқув-услугий фильмлар ишлаб чиқариш ҳамда ўқув-услугий фильмлар портали ва мобиль иловасини яратиш харажатлари учун маблағлар давлат буюртмасига асосан миллий кино маҳсулотларини яратиш учун ҳар йили Ўзбекистон Республикаси республика бюджетидан биринчи даражали бюджет маблағларини тақсимловчи сифатида Маданият вазирлигига ажратиладиган маблағларнинг чекланган миқдорлари доирасида ажратилади.

Бунда, Олий таълим, фан ва инновациялар вазирлиги учун ўқув-услугий фильмларни ишлаб чиқариш билан боғлиқ харажатлар ушбу вазирликнинг ўз маблағлари ҳисобидан амалга оширилади.

5. Кинематография агентлиги Олий таълим, фан ва инновациялар вазирлиги ҳамда Мактабгача ва мактаб таълими вазирлиги билан биргаликда:

республика давлат таълим муассасаларида дарс ўтишда фойдаланиладиган ўқув-услубий фильмларни юқори савияда тайёрлаш ҳамда ўқувчи ва талабаларга етказиб бериш бўйича тизимли ишларни йўлга қўйсин;

ўқув-услубий фильмларни тайёрлашда киноижодкорлар ва таълим соҳаси мутахассисларининг ўзаро ҳамкорлигини ташкил қилсин.

6. Олий таълим, фан ва инновациялар вазирлиги ҳамда Мактабгача ва мактаб таълими вазирлиги **бир ой муддатда** республика давлат таълим муассасаларида ўқув-услубий фильмлар ёрдамида дарс ўтиш тизимини жорий этиш тартибини ишлаб чиқсин ва тасдиқласин.

7. Мазкур қарорнинг бажарилишини назорат қилиш Ўзбекистон Республикаси маданият вазири О.А. Назарбеков, мактабгача ва мактаб таълими вазири Х.Ў. Умарова ҳамда олий таълим, фан ва инновациялар вазирининг биринчи ўринбосари К.Х. Каримов зиммасига юклансин.

**Ўзбекистон Республикасининг  
Бош вазири**



**А. Арипов**

Вазирлар Маҳкамасининг  
2024 йил “ 13 ” январдаги 24 -сон қарорига  
илова

**Республика давлат таълим муассасаларида дарс ўтиш  
учун фойдаланиладиган ўқув-услугий фильмларни ишлаб  
чиқариш тартиби тўғрисида  
НИЗОМ**

**1-боб. Умумий қоидалар**

1. Ушбу Низом давлат олий таълим, ўрта махсус, профессионал ҳамда умумий ўрта таълим муассасаларида (кейинги ўринларда – таълим муассасалари) дарс ўтиш учун фойдаланиладиган ўқув-услугий фильмларни (кейинги ўринларда – фильмлар) ишлаб чиқариш тартибини белгилайди.

2. Фильмлар мавзулари Ўзбекистон Республикаси Олий таълим, фан ва инновациялар вазирлиги ҳамда Мактабгача ва мактаб таълими вазирлиги (кейинги ўринларда – вазирликлар) томонидан тасдиқланади.

3. Ўзбекистон Республикаси Маданият вазирлиги ҳузуридаги Кинематография агентлиги (кейинги ўринларда – Кинематография агентлиги) буюртмасига асосан вазирликлар томонидан тасдиқланган рўйхатга мувофиқ ҳар йили 50 тагача фильм ишлаб чиқарилади.

4. Ўзбекистон Республикаси республика бюджетидан давлат буюртмасига асосан таълим муассасаларида дарс ўтишда фойдаланиладиган ўқув-услугий фильмларни ишлаб чиқариш харажатлари учун ажратиладиган маблағлар бўйича харажатлар сметасини тузиш, тасдиқлаш, рўйхатдан ўтказиш ва унга ўзгартиришлар киритиш бюджет қонунчилигида белгиланган тартибда амалга оширилади.

5. Таълим муассасаларида дарс ўтишда фойдаланиладиган ўқув-услугий фильмларни ишлаб чиқарувчилар давлат харидлари тўғрисидаги қонунчиликка мувофиқ харид қилиш тартиб-таомиллари натижаларига кўра аниқланади.

6. Фильмларни ишлаб чиқариш ушбу Низомга 1-иловада келтирилган схемага мувофиқ амалга оширилади.

**2-боб. Фильмлар мавзуларини белгилаш ва ишлаб чиқариш тартиби**

7. Вазирликлар томонидан ҳар йили 30 январга қадар фильмларнинг тасдиқланган мавзулари рўйхати Кинематография агентлигига тақдим этилади. Бунда:

фильмларнинг мавзулари ўқувчи ва талабалар ўзлаштириши мураккаб бўлган фанлар, уларнинг асослари, мавзулари (формула, теорема, қонуниятлари) асосида шакллантирилади;

ҳар бир фильмга вазирликлар томонидан масъул консультантлар (эксперт, ўқитувчи, соҳа мутахассиси) бириктирилади ҳамда улар фильмларни ишлаб чиқариш жараёнида иштирок этади;

фильмларнинг мавзулари рўйхати ушбу Низомнинг 2-иловасида келтирилган намунавий шаклга мувофиқ тузилади.

8. Кинематография агентлиги томонидан ҳар йили 30 апрелга қадар 10-15 дақиқалик фильмларнинг адабий сценарийлари ва харажатлар сметаси тайёрланади, ижодий гуруҳлар шакллантирилади.

9. Кинематография агентлигининг Бадий кенгаши ва Экспертлар кенгаши томонидан вазирликлар томонидан тақдим этилган рўйхат асосида ҳар йили 1 июнга қадар фильмларнинг адабий сценарийси ва харажатлар сметаси кўриб чиқилади ва улар юзасидан тегишли хулоса берилади.

Кинематография агентлигининг Бадий кенгаши ва Экспертлар кенгаши таркибига вазирликлар вакиллари киритилади.

Ўқув-услугий фильмларнинг адабий сценарийси ва харажатлар сметасини кўриб чиқиш Кинематография агентлигининг Бадий кенгаши ва Эксперт кенгаши тўғрисидаги низомларда белгиланган тартибда амалга оширилади.

10. Кинематография агентлиги томонидан ҳар йили 30 июнга қадар фильмларни ишлаб чиқариш бўйича давлат буюртмалари шакллантирилади ва фильмларни ишлаб чиқарувчилар билан шартномалар тузилади.

11. Фильмлар давлат буюртмаси асосида уни ишлаб чиқарувчилар томонидан йил якунига қадар ишлаб чиқилади.

### **3-боб. Фильмларни кўриб чиқиш ва қабул қилиш тартиби**

12. Ишлаб чиқариш якунланган фильмларни кўриб чиқиш ва қабул қилиш бўйича Кинематография агентлигида кенгайтирилган Бадий кенгаш (кейинги ўринларда – Кенгаш) ташкил қилинади.

Кенгаш вазирликлар ва Кинематография агентлиги вакиллари билан иборат таркибда шакллантирилади.

13. Фильмлар Кенгашнинг ижобий хулосаси берилган тақдирда, унинг қарори асосида қабул қилинади. Кенгашнинг салбий хулосаси бўлган тақдирда, фильм қайта ишлаш учун қайтарилади.

14. Фильмлардан таълим муассасаларида дарс ўтиш жараёнида фойдаланилади.

15. Фильмлар Кинематография агентлиги томонидан яратиладиган ўқув-услугий фильмлар портали ва унинг мобиль иловасига юкланади.

### **4-боб. Якунловчи қоида**

16. Мазкур Низом талаблари бузилишида айбдор бўлган шахслар қонун ҳужжатларида белгиланган тартибда жавобгар бўлади.

Республика давлат таълим  
муассасаларида дарс ўтиш учун  
фойдаланиладиган ўқув-услубий  
фильмларни ишлаб чиқариш  
тартиби тўғрисидаги низомга  
1-илова

Республика давлат таълим муассасаларида дарс ўтиш учун  
фойдаланиладиган ўқув-услубий фильмларни ишлаб чиқариш  
СХЕМАСИ

Босқичлар	Субъектлар	Тадбирлар	Бажариш муддатлари
1-босқич	Олий таълим, фан ва инновациялар вазирлиги ҳамда Мактабгача ва мактаб таълими вазирлиги	Фильмларнинг мавзулари рўйхатини шакллантиради ҳамда Кинематография агентлигига тақдим этади	Ҳар йили 30 январга қадар
2-босқич	Кинематография агентлиги	Фильмларнинг адабий сценарийлари ва харажатлар сметасини тайёрлайди, ижодий гуруҳларни шакллантиради	Ҳар йили 30 апрелга қадар
3-босқич	Кинематография агентлигининг Бадий кенгаши ва Экспертлар кенгаши	Фильмларнинг адабий сценарийси ва харажатлар сметасини кўриб чиқади, хулоса беради	Ҳар йили 1 июнга қадар
4-босқич	Кинематография агентлиги	Фильмларни ишлаб чиқариш бўйича давлат буюртмаларини шакллантиради, шартномалар тузади	Ҳар йили 30 июнга қадар
5-босқич	Фильмларни ишлаб чиқарувчилар	Фильмларни ишлаб чиқаришни якунлайди	Йил якунига қадар
6-босқич	Кинематография агентлигининг кенгайтирилган Бадий кенгаши	Фильмларни кўриб чиқади ва қабул қилади (ёки рад этади). Рад этилган фильмлар қайта ишлаш учун қайтарилади.	Йил давомида

Республика давлат таълим  
муассасаларида дарс ўтиш учун  
фойдаланиладиган ўқув-услубий  
фильмларни ишлаб чиқариш  
тартиби тўғрисидаги низомга  
2-илова

**Республика давлат таълим муассасаларида дарс ўтиш учун  
фойдаланиладиган ўқув-услубий фильмлар мавзулари рўйхатининг  
НАМУНАВИЙ ШАКЛИ**

<b>T/p</b>	<b>Фильм мавзуси</b>	<b>Мавзу тавсифи</b>	<b>Масъул консультант (Ф.И.О., боғланиш маълумоти)</b>
1.			
2.			
3.			
...			

